

## “Ҳар кунинг наврўз бўлсин, жонажон Ўзбекистоним!” | Фурқат туманида Наврўз байрами кенг нишонланди

Шу кунларда янгиланиш ва яшариш байрами, дея ном олган, ҳар биримизнинг кўнглимиизга баҳорий илиқлик ҳамда гўзалликни олиб кираётган севимли айём – Наврўз туфайли табиат чирой очмоқда.

Туманда наврўзи олам баҳона кенг кўламда ободонлаштириш, кўкаламзорлаштириш ва ҳудудларни яшил маконга айлантириш тадбирлари олиб борилди. Жойларда саховат, ҳайрия тадбирлари билан бир қаторда катта дошқозонларда миллий таомлар пиширилиб, сумалак сайллари ўтказилди.

Фурқатликлар қадриятлар тараннуми, янги кун рамзи бўлган шодиёнани кенг нишонлашга киришган. Бугун Фурқат тумани Навбаҳор шаҳарчасида жойлашган Марказий ўйингоҳда “Ҳар кунинг Наврўз бўлсин, жонажон Ўзбекистоним!” деган бош ғоя асосида байрам сайли ўтказилди. Тантанали тадбирни туманимизнинг барча маҳаллаларидан келган аҳоли вакиллари, ташкилот ва корхоналар ишчи-ходимлари бойитдилар.

Тадбирни туман ҳокими Жаҳонгир Жуманов табрик сўзи билан очиб, бу йилги Наврўз тантаналари туманимизда ўзгача бир руҳда, янгиликларга бой тарзда ўтказилаётганлигини алоҳида эътироф этди. Тинчлик, дўстлик, биродарлик туйғуларини мустаҳкамлаш, халқимиз, ёш авлод онгига Ватанимизнинг бугуни ва эртасига дахлдорлик туйғусини янада мустаҳкамлашда Наврўз байрамининг ўрни бекиёс эканлигини алоҳида таъкидлади.

Хулоса қилиб айтганда, минг йиллар давомида маънавий ҳаётимизнинг кўрку-зийнати бўлиб келаётган бу ажойиб, ҳосиятли байрам бугун қалбларимизга яна чексиз қувонч ва завқ бағишиламоқда.

Байрам тадбири давомида Яхёбек Мўминов, Машхура Эргашева, Муқаддас Жўраева сингари халқимиз ардоғидаги санъаткорларнинг ташрифи ва ижро этган куй-қўшиқлари тадбир иштирокчиларига чинакам байрам кайфиятини улашди.

Бундан ташқари туман Маданият ходимлари ижодкор ва санъаткорлари томонидан тайёрланган адабий-мусиқий дастур йиғилганларга ҳавола этилди. Бир томонда миллий дор ўйинлари, варрак учириси, кураш сингари миллий ўйинлар, бир томонда ошпазлар фестивали ташкил этилиб, томошибинларни ўзига жалб этди. Ташкилотчилар томонидан ҳавола қилинган кўргазмали ярмаркада эса қўл меҳнати намуналари, миллий таомлар ва пишириқлар, миллий кийимлар намуналари намойиш этилди.

Буларнинг барчаси бу йилги Наврўз байрамининг янада файзли ва шукуҳли ўтишини таъминлади. Байрам тантаналари маҳаллаларда, ташкилот ва меҳнат жамоаларида давом этади.

2023-03-17 19:14:04